

Eko-turistička kampanja 'Sačuvajmo prirodu i kulturu'

Akciona grupa „Za čisti sliv rijeke Bosne“ započela je Eko-turističku kampanju u okviru projekta „Čista rijeka Bosna“. Kampanja se realizuje pod sloganom 'Sačuvajmo prirodu i kulturu'. Ciljevi kampanje su podizanje ekološke i turističke svijesti stanovništva, kao i podstrek za stavljanje u funkciju raspoloživih ljudskih i tehničkih resursa za poboljšanje imidža područja u slivu rijeke.

U planu je elektronska kampanja putem društvenih mreža, sa planom da se tokom tri mjeseca ostvari 1.000.000 pregleda, čime ćemo doprinijeti jačanju ekološke i turističke svijesti stanovništva. Kampanju će podržati Timovi Akcione grupe u partnerskim lokalnim zajednicama, i doprinijeti njenoj kvalitetnoj realizaciji.

Segment kampanje je medijsko animiranje nesavjesnih posjetilaca obala rijeke Bosne da poboljšaju svoje ponašanje putem akcije 'Odgovorni ribar' u koju će biti uključena ribolovna udruženja. Tokom akcije biće realizovan konkurs za najuređeniji ribolovni revir na obalama rijeke Bosne. Na kraju ljeta biće izabran najuređeniji revir i pobjedničkom ribolovnom udruženju će kao nagrada biti uručen riječni čamac.

Tokom ljeta će se realizovati video material za eko-turistički film koji će animirati stanovništvo, institucije i dijasporu da se uključe u rad na poboljšanju kompletnog imidža lokalnih zajednica. Film će biti emitovan na lokalnim medijima i internet portalima u slivu.

Za vrijeme kampanje biće promovisana već postojeća Aplikacija za mobilne telefone CRB <https://play.google.com/store/apps/details?id=air.com.coffeebreak.CRB> putem koje se mogu prijaviti divlje deponije na području partnerskih lokalnih zajednica. Aplikacija CRB će biti promovisana i učenicima škola u partnerskim gradovima tokom školske godine. Osim mogućnost prijavljivanja novih nelegalnih odlagališta, aplikacija nudi rješavanje eko kviza i korištenje igrice na temu čišćenja rijeke, u cilju jačanja ekološke svijesti mlade populacije.

Kampanja je uvod u akciju koja će animirati stanovništvo da podrži predstavnike javnog i komunalnog reda u obavljanju svojih dužnosti, kao i zajedničko stvaranje boljeg imidža lokalnih zajednica. Zatim slijedi dugo očekivano dosljedno realizovanje novčanih kazni za počinitelje nelegalnog bacanja smeća i odlaganja otpada. Paralelno sa navedenim, ići će animiranje

stanovništva za podizanje ekološke svijesti, da bi se u ravnoteži sa kaznama došlo do potrebnog napretka.

Aktivnosti kampanje biće medijski praćene, a informacije i video material biće postavljen na web stranici www.cista-rijeka-bosna, društvenim mrežama Facebook Fan Page-u 'Čista Rijeka Bosna' i na YouTube kanalu 'cista-rijeka-bosna'.

Članstvo Akcione grupe „Za čisti sliv rijeke Bosne“ sačinjavaju gradovi/općine/opštine: Ilidža, Centar Sarajevo, Ilijaš, Visoko, Kakanj, Zenica, Žepče, Zavidovići, Maglaj, Tešanj, Doboj Jug, Doboj, Modriča, Šamac, zatim JU Institut za zdravlje i sigurnost hrane Zenica, Federalna uprava civilne zaštite, Republička uprava civilne zaštite Republike Srpske, u koordinaciji ROTOR organizacije za razvoj turizma regije. Akciona grupa radi na zagovaranju zaštite životne sredine, uspostavljanju kontinuiteta ekološko-turističkih aktivnosti, podrške institucija aktivnostima projekta, kao i ekološkoj i turističkoj valorizaciji područja u dolini Bosne.